

आकाशवाणी रायपुर (छत्तीसगढ़)

(छत्तीसगढ़ी)

दिनांक 23.06.2024

18.10 रविवार

प्रमुख समाचार –

- सुकमा जिला के सिलगेर म माओवादी मन डहार ले करे गे आई.ई.डी बिस्फोट— दू झिन जवान मन होइन सहीद ।
- नीट-यूजी परीक्षा म कथित पेपर लीक होय के मामला म केंद्रीय अन्वेसन ब्यूरो ह एफआईआर दर्ज करीन ।
- छत्तीसगढ़ माध्यमिक शिक्षा मंडल डहार ले आयोजित हायर सेकेंडरी मुख्य परीक्षा बछर – दू हजार चौबीस के पुनर्गणना अउ पूनर्मूल्यांकन के परीक्षा परिणाम आज होइस जारी ।

युजीसी-नीट-एफ.आई.आर

नीट-यूजी परीक्षा म कथित पेपर लीक होय के मामला म केंद्रीय अन्वेसन ब्यूरो ह एफआईआर दर्ज करीन हे । ब्यूरो डहार ले मिले जानबा के मुताबिक ए एफआईआर शिक्षा मंत्रालय के सिकायत म दर्ज करे गीस हवय । व्यापक जांच अउ बड़का साजिस के पर्दाफास करे खातिर ब्यूरो ए मामला म देसभर म दर्ज मामला ल घलो अपन हाथ म ले खातिर कदम उठावत हे ।

शिक्षा मंत्रालय काली राष्ट्रीय पात्रता सह प्रवेश परीक्षा –नीट-यूजी दू हजार चौबीस म कथित अनियमितता के मामला के बिस्तार ले जांच करे खातिर केंद्रीय अन्वेसन ब्यूरो ल सौंप दे रिहीन । मंत्रालय ह एक टिन बयान म किहीन कि सरकार परीक्षा के साफ सुथरा अउ पढ़इया लइका के हित सुनिश्चित राखे बर प्रतिबद्ध हवय । कोनो मनखे या फेर संगठन ए मामला म लिप्त पाय जाथे त, उंखर खिलाफ कड़ा कार्रवाई करे जाथे ।

जवान शहीद

सुकमा जिला के सिलगेर म माओवादी मन डहार ले करे गे आई.ई.डी बिस्फोट म दू झिन जवान मन सहीद होगे हवय। उहें, कुछेक जवान मनके घायल होय के खबर मिले हे। हमर संवाददाता ह बतइन कि माओवादी मन ह जवान मन ल ले जावत एक टिन गाड़ ल निसाना बनावत आईईडी ब्लास्ट करीन।

माओवादी-नकली नोट

सुकमा जिला ले सुरक्षा बल ह तलासी के दौरान माओवादी मन डहार ले छापेगे नकली नोट बरामद करीन हे। मउका ले नकली नोट के सेम्पल, प्रिंटर, स्याही अउ आने-आने जिनिस जब्त करे गे हवय।

पुलिस अधीक्षक किरण चव्हाण ह बतइन कि जिला बल, डिस्ट्रिक्ट रिजर्व गार्ड-डीआरजी, बस्तर फाईटर अउ केंद्रीय रिजर्व पुलिस बल-सीआरपीएफ के संयुक्त पार्टी सर्चिंग खातिर ग्राम मैलासूर, कोराजगुड़ा, दंतेशपुरम अउ तीर-तखार के क्षेत्र कोति रवाना होय रिहीन। ए दौरान सुरक्षा बल मन ल देखके माओवादी मन जंगल कोति भाग गीन। सुरक्षा बल मन ह घटनास्थल के सर्चिंग के दौरान आने-आने जघा मन म माओवादी मन डहार ले छिपाके राखेगे नकली नोट बनाय के उपकरण समेत 50, 100, दू सौ अउ 500, के नकली नोट के सेम्पल के अलावा बहुत अकन बंदूक, वायरलेस सेट, मैग्जीन पाउच, वर्दी अउ अब्बड़ मात्रा म बिस्फोटक जिनिस बरामद करे हे।

माओवादी-मुठभेड़

धमतरी जिला म पुलिस ह एक झिन महिला माओवादी ल गिरफ्तार करे हे। मिले जानबा के मुताबिक मैंगो नुरेटी नाव के ए माईलोगिन घायल हालत म ओडिसा भागे के फिराक म रिहीस, ए दौरान सर्चिंग म निकले ओडिसा पुलिस के टीम ह ओला एकावरी ले गिरफ्तार करीस अउ फेर छत्तीसगढ़ पुलिस ल सौंप दीन।

जिला के डीएसपी नक्सल आपरेसन, आरके मिश्रा ह बतइन कि पाछू दिन डीआरजी के टीम अउ माओवादी मन के बीच मुठभेड़ होय रिहीस। इही दौरान जब ए महिला नक्सली ल गिरफ्तार करे गीस, त उंखर पैर म गोली लगे रिहीस अउ धमतरी पुलिस ह तकरीबन दू महिना तक रईपुर के मेकाहारा म अउ फेर जिला अस्पताल धमतरी म इलाज करवाय रिहीस। जानबा के मुताबिक घायल महिला माओवादी मैंगो नुरेटी एकावरी मुठभेड़ के मास्टरमाइंड रिहीस अउ अब्बड़ अकन माओवादी वारदात मन म सामिल रिहीस।

कलेक्टर-बैठक

बलौदाबाजार जिला के कलेक्टर दीपक सोनी अउ बड़का पुलिस अधीक्षक विजय अग्रवाल ह कानून बेवस्था सेति राजस्व अउ पुलिस विभाग के अधिकारी मन संग गोठबात कर समीक्षा बइठका करीन। बइठका म कलेक्टर अउ पुलिस अधीक्षक मन ह जम्माँ एस.डी.एम. अउ एस.डी.ओ.पी. मन ल सूचना तंत्र मजबूत करे अउ पुलिस के गस्त ल बढ़ाय के निरदेस दीन। ओमन गांव म बेरा-बेरा म सांति समिति के बइठका कराय अउ धार्मिक जघा मन म निगरानी राखे ल घलो किहीन। कलेक्टर ह रैली अउ धरना प्रदर्शन करे खातिर अनुमति लेवय ले पहिली सपथ पत्र प्रस्तुत करे बर किहीन। संगेसंग तहसीलदार अउ थानेदार मन ल गांव के विवादित प्रकरण ल तुरतेच सुलझाय के निरदेस दीन।

पुनर्गणना और पुनर्मूल्यांकन-परिणाम

छत्तीसगढ़ माध्यमिक शिक्षा मंडल डहार ले आयोजित हायर सेकेंडरी मुख्य परीक्षा बछर – दू हजार चौबीस के पुनर्गणना अउ पुनर्मूल्यांकन के परीक्षा परिणाम आज जारी कर दे गे हवय। ए परीक्षा परिणाम माध्यमिक शिक्षा मंडल के वेबसाइट म देखे जा सकथे।

छत्तीसगढ़ माध्यमिक शिक्षा मंडल के सचिव ह बतइन कि पुनर्गणना के एक हजार चौरासी अउ पुनर्मूल्यांकन के नौ हजार आठ सौ छिहत्तर आवेदन प्राप्त होय रिहीस। मंडल डहार ले जारी करे गे पुनर्गणना के 153 अउ पुनर्मूल्यांकन के चार हजार दू सौ चौरासी आवेदक मनके अंक म बदलाव होय हे।

मुख्य सचिव-बैठक

मुख्य सचिव अमिताभ जैन ह प्रदेश के कमश्नर अउ कलेक्टर मन ले वीडियोकॉन्फ्रेंसिंग के जरिया ले आने-आने योजना मनके क्रियान्वयन करे खातिर गोठबात करीन। ओमन चालू खरीफ सीजन म सही बेरा म किसान मन ल खाद अउ बीज उपलब्ध कराय के निरदेस दीन। संगेसंग प्रधानमंत्री किसान सम्मान निधि के हितग्राही किसान मन बर सिविर लगाके बैंक खाता म आधार सीडिंग समेत जउन किसान मन के केवायसी पेंडिंग हवय, ओला पूरा करे बर किहीन हे। ओमन किहीन कि एफ.आर.ए. के हितग्राही मनके नामांतरण खातिर जरूरी कार्यवाही करे जाय।

एक जुलाई ले लागू होवइया तीन ठिन नवा कानून खातिर मुख्य सचिव ह हर जिला म कार्यसाला आयोजित कर मनखे अउ कॉलेज पढ़इया लइका मनके भागीदारी सुनिश्चित करे के निरदेस दीन। ओमन

किहीन कि नामांतरण, बटांकन, डायवर्सन समेत आने राजस्व प्रकरण मनके निराकरण खातिर बिसेस अभियान चलावय। अइसनेच श्रम पोर्टल म दर्ज श्रमिक मनके रासन कार्ड बनाय जाय।

श्यामा प्रसाद मुखर्जी-पुण्यतिथि

डॉक्टर श्यामा प्रसाद मुखर्जी के पुण्यतिथि के मउका म मुख्यमंत्री विष्णुदेव साय ह उंखर फोटू उपर फूलमाला चढ़ाके उनला श्रध्दांजलि दीन। मुख्यमंत्री ह किहीन कि देस के एकता ल अउ जादा मजबूत करे के दिसा म डॉक्टर श्यामा प्रसाद मुखर्जी के योगदान ल हमेसा याद राखे जाही। उंखर आदर्स म चलत हमन समृद्ध अउ सशक्त भारत के निर्माण डहार बढ़त हावन।

मुख्यमंत्री-राज्यमंत्री मुलाकात

मुख्यमंत्री विष्णुदेव साय ले आज रईपुर स्थित उंखर निवास कार्यालय म केंद्रीय आवास अउ सहरी मामला के राज्यमंत्री तोखन साहू ह सौजन्य मुलाकात करीन। इही दौरान मुख्यमंत्री ह केंद्रीय राज्यमंत्री के संग छत्तीसगढ़ म आवास अउ सहरी विकास के योजना म तेजी लाय सेति गोठबात करीन। मुख्यमंत्री ह तोखन साहू ल केंद्रीय राज्यमंत्री बने खातिर अपन बधई अउ सुभकामना दीन। ए मउका म विधायक पुरंदर मिश्रा समेत, बिलासपुर, लोरमी, तखतपुर अउ मुंगेली क्षेत्र ले आय लोगन मन हाजिर रिहीन।

बस्तर-वृक्षारोपण

बस्तर के देवगुड़ी-मातागुड़ी म सात हजार ले जादा अउ वन अधिकार मान्यता पत्र जघा के तीर-तखार म तीन हजार ले जादा पेड़ लगाय के अभियान चलाय जाही। ए अभियान के चलत नीम, आम, जामून, करजी, अमलताश जइसन फलदार अउ छायादार पेड़-पौधा लगाय जाही। बस्तर के सात टिन जिला मन म 5 लाख ले जादा पउधा के रोपड़ करे खातिर बस्तर कमिश्नर ह जिला पंचायत के मुख्य कार्यपालन अधिकारी ल नोडल अधिकारी बनाय हवय। वृक्षारोपण के ए मुहिम म जनजाति समुदाय ल भी सामिल करे जाही। कमिश्नर ह वन विभाग के सहयोग ले 15 जुलाई तक पउधा लगाय के लक्ष्य राखे हे। संगेसंग कलेक्टर मन ल वृक्षारोपण अभियान के निगरानी करे के निरदेस घलो दीन हवय।

मौसम

अउ अब पेस हे मौसम के हाल...

छत्तीसगढ़ म दू दिन बाद यानि 26 जून ले बरसा के गतिविधि बाढ़े के संभावना हवय। मौसम विभाग के अनुसार 27 अउ 28 जून के राज्य के अधिकांश जघा म हल्का ले मध्यम बरसा हो सकत हे। उन्हें,

दक्षिण छत्तीसगढ़ के एक-दू जघा म भारी बरसा होय के संभावना जताय गेहे । राज्य म अवइया चौबीस घंटा म कुछ-कुछ जघा म गरज-चमक के संग अंधड़ चले अउ गाज गिरे के आसंका हवय ।

